

**Nunatsinni umiarsuarni aqumiutut ilinniarsimasut suliffissaqarnikkut periarfissaat qanoq pitsaanerulersinneqarsinnaanersut qulaajarumallugu apeqquteqaat aallaavigalugu oqallinnissamik siunnersuut**

(Inatsisartuni ilaasortat Saxdorph Didriksen aamma Lars Mathæussen, Siumut)

**Akissuteqaat**

(Aalisarnermut, Piniarnermut Nunalerinermullu Naalakkersuisoq)

**Siullermeerneqarnera**

Naalakkersuisut apeqquteqaat aallaavigalugu oqallinnissamik siunnersuut saqummiunneqartoq qujassutigaa, taamaaliortoqarneratigullu Nunatsinni umiarsuarni aqumioqarnerup iluani piginnaasat ineriartortinneqarnissaasa qanoq pingaaruteqartiginera isiginiarneqarmat.

Kalaallit aalisariutaanni inuttalersuisarneq pillugu Namminersorlutik Oqartussat nalunaarutaat nr. 13, 17. november 2011-imeersoq malillugu kalaallit aalisariutaanni kalaallit suliffissaqartinnissaasa qulakkeerneqarnissaa anguniarneqarpoq.

§ 2. Inuttaasut officeriusut minnerpaamik 60 %-ii inuussapput

- 1) inuit pineqartut tamarmik Kalaallit Nunaanni najugaqartutut inuit nalunaarsorsimaffianni nalunaarsorsimassasut, Kalaallit Nunaannilu inuit aqqisa nalunaarsorsimaffianni qaammatisiutit ukiuini kingullerni marlunni nalunaarsorsimassallutik, aamma
- 2) inuit pineqartut tamarmik Kalaallit Nunaannut tamakkiisumik akileraartartussaataassapput, qaammatisiutillu ukiuini kingullerni marlunni Kalaallit Nunaanni tamakkiisumik akileraartartussaataasimassallutik.

*Imm. 2.* Tamatumunnga atatillugu angallammi inuttaasut imatut inissisimasut officeritut paasineqassapput:

- 1) angallatip naalagaa,
- 2) aquttut,
- 3) igasoq/pilittaq,
- 4) qaavani sulisut naalagaat aamma
- 5) suliffissuarmi pisortaq aamma suliffissuarmi aqutsisoq.

Nalunaarummik eqqortitsinissaq Aalisarnermut, Piniarnermut Nunalerinermullu Naalakkersuisoqarfimmiit isumagineqarpoq, inuttalersuisarnerlu pillugu nalunaarummik unioqutitsinerit tamarmik politiinut unnerluutigineqartarnissaat aallaavigineqarpoq. Unioqutitsinerit misissuiffigineqarnissaat eqqartuussivinnilu suliarineqarnerat eqqarsaatigalugit eqqartuussutip inernera sivilaartumik utaqpineqarsinnaasarpoq. Taamaattorli Aalisarnermut, Piniarnermut Nunalerinermullu Naalakkersuisoqarfiup oqartussaasut ilanngunneqartut suleqatigalugit suliat sukkaasumik suliarineqartarnissaat qulakkeerniartarpaa. Nalunaarut eqqortinneqarluartut Naalakkersuisut isumaqarfigaat.

Unioqutitsisoqarsimatillugu kinguneqartitsisarneq eqqarsaatigalugu aallarnermi ataatsimi inummut ataatsimut 5.000 kr.-inik akiliisitsisoqartarnissaa inuttalersuisarnermut nalunaarummi aallaaviuvoq. Soorlu assersuutigalugu aqumiut qulit ilaatillugit aqumiut marluk kisimik piumasaqaatinik naammassinnissimappata umiarsuaatileqatigiiffik 5.000 kr.-

inik sisamariarluni akiliisussaassaaq, tassalu katillugit 20.0000 kr.-inik aallarnermi ataatsimi akiliisussaassaaq. Arlaleriarluni taamaaliortoqarpat qaffasinnerusumik akiliisitsinermik kinguneqassaaq.

Ullutsinni ajoraluartumik aalisarnermi aqumiut pisinnaasallit suliffissarsiortullu pissarsiarineqarsinnaaneq ajorput. Akerlianillu kalaallit aqumiut sulisortaarissallugit ajornartarluni.

Umiarsuarni aqumiunik kalaaliusunik pissarsiniartarnerup ajornartuunerata nassuerutigineranut ilaasumik kalaallinik aqumiunik amerlanernik pissarsiniartarnissaq siunertaralugu suliniartoqarnissaa pilersaarutigineqalerpoq. Taamatut sulisussarsiortarnissaq Kalaallit Nunaanni Sulisitsisut Peqatigiiffiannit ataqatigiissaarneqarpoq, suleqatigiittoqarneranilu Imarsiornermik Ilinniarfik, Polar Seafood, Royal Greenland, Royal Arctic Line aamma Sermilik peqataapput. Suliniartoqarnerani siunertaavoq inuusuttut pikkorissut aalisariutini imarpikkoorutinilu inuttassatut ilinniartillugit imarsiornermik ilinniarfimmi atuartalernissaasa anguniarneqarnissaa. Tamatumani pingaarnertut pineqarput aqumiut, sumiissusersiortartut, maskinmesterit fiskeriteknologillu.

Umiarsuarni aqumiunik kalaallinik sulisussarsiortarnerup ajornartorsiutaanera aalisarnerup iluani nassuerutigineqarmat peqataanillu kalaallit angallataasa aqumiunik kalaallinik inuttaqartinnissaannik misigisimasoqarmat isumaqarpunga angallataatitsinni kalaallit pingaarnertigut inuttarineqartarnissaat pingaaruteqarluinnartoq. Taamaammat nuannaarutigaaara inuussutissarsiortut taamatut suliniuteqalersimammata.

Kalaallit umiarsuarni aqumiuusut nalinginnaasumillu inuttaasut kattuffik aqutigalugu suleqatigiiffeqanngimmata akornutaavoq. Umiartortortatta kattussuunnerisigut inuussutissarsiut annerusumik isiginiarneqalissaaq, taamaaliornikkullu aalisartut umiartortullu umiarsuaatileqatigiinnut annerusumik sakkusaqalissapput. Taakku saniasigut kattussuuttoqarneratigut umiartortut inuiaqatigiinni pingaaruteqassusiat, ilaasortaasut nunatsinni soqutigisaasa isumagineqarnissaat ersersinneqassapput, inuussutissarsiummilu ajunnginnerusumik sulisussarsiortarnissaq peqataaffigineqalerluni.

Angallataatigut – imarpikkoortaatit aalisariutillu – nunani tamalaani piumasarineqartunut ilanngunneqarsimapput, tamatumalu kingunerallugu aqumiut imaani inuussutissarsiuteqarnermut uppernarsaammik, tassalu STCW-mik, pigisaqarnissaannik piunaffigineqassasut. Ullutsinni kalaallit aqumiut arlallit imaani inuussutissarsiuteqarnermut uppernarsaammik killeqartumik pisussaaffiliisumik pigisaqarput, taamaamallu aqumiut taakku nunat tamalaat imartaanni aqumiuusinnaanngillat, taamaalillutillu suliffissarsiorsinnaanerat killeqarluni.

Imarsiornermik Ilinniarfimmi ilinniarnertit allangortiterniarlugit suliniutit eqqortumik iliornerusimapput. Ilinniarnernik nunani tamalaani maleruaqqusanut STCW-meersunut naapertuuttunut Imarsiornermik Ilinniarfimmi neqerooruteqartoqarpoq, ilaatigullu Nuummi aqumiutut ilinniarnissamat nalunaarnissaq soqutigineqarluarluni. Sapaatip akunnerata tulliani ilinniartut Imarsiornermik Ilinniarfimmiittut 20-t missaasa ilinniarnerminnik naammassinnissisasut naatsorsuutaavoq, massakkullu aqumiutut ilinniartut 30-t missaanniillutik. Taamaammat kalaallit aqumiutut ilinniagaqarlutik naammassisut amerlanerulernissaat ilimanarnerulerpoq.

Imarsiornermik Ilinniarfik aamma aqumiunut imaani inuussutissarsiuteqarnissamat uppernarsaammik amigartumik pigisaqartunut ilinniaqqinnissamik neqerooruteqarpoq, inuit

taakku taamaalillutik angallataatitsinni nunat tamalaat imartaanni angalasuni aqumiutut sulinissamik periarfissinneqassammata.

Inuusunnerusut soqutiginnilersinniarlugit meeqqat atuarfianni aallartittumik Nunatsinni inuussutissarsiutip pingaarnissaannik – tassalu aalisarneq – inuusuttavut soqutiginnilersittariaqarpavut. Aqumiutullu ilinniarneq soqutiginarartariaqarpoq, taamaaliornikkummi angallataatitsinni siunissami sulilernissaq kajuminnarnerulissammat, siunissamilu imaatigut inuussutissarsiuteqarnitta ingerlateqqinneqarnissaa suliassaassaaq naalakkersuineramik suliaqartut inuussutissarsiuteqartullu pingaartittariaqagaat.

Sulisussat amerlisarniarlugit inuusuttunik ilinniagaqanngitsunik ilinniartitsinissaq aamma sulisussat amerlisarnissaannut pingaaruteqarpoq.

Oqaatsit taakku atorlugit oqallittoqarluarnissaa kissaatigaara.